

Kayëta iyanar ir Timote Lilaya in

Akayëta aņo ro, Pol yëgwën baņo Timote, ar enga emat gë gër andiyen and Kaxanu an. Gër akayëta aņo osëyali or Pol ol ex: end bësëyali bënëgwëš eņ; gë end ang yapëk ecale ak; do gë end ang yapëk exo dıyand alëngw ar Amara ak.

Er ex gër akayëta in:

End anıyan and gër Amara eņ: 1.1–3.13.

End ekwëta ed đal eņ do gë end osëyali or enëgwëš eņ: 3.14–4.5.

End bapela band bëlëngw bër bamara eņ: 4.6–6.21.

Ecëmar el

¹ Wëno Pol kë yëgwëlınd kayëta ijo ro. Parëxanda ir Yesu Kërisët hi këme ang re këni Kaxanu, mëņ ar fexën këbo an, do gë Kërisët, ar kënëņo yarënde an.

² Wëj Timote këmi yëgwënëlınd, wëj ar hik enim asëniwën ga bar ke ako ekwëta edebat. Awa Faba Kaxanu do gë Yesu Kërisët Axwën arebi an, yëlëleni oyekax ol, axayënan in do gë obetak ol!

End bësëyali bënëgwëš eņ

³ Në ekwitan emi end fel bami đamana me yexën gër ebar ed Masedëwan eņ mëne ey bayi na gër Angol and Efes do eyëbi dexërand bërëmar eni teb osëyali or bënëgwëš ol.

⁴ Pelindëbi eni teb ebalëkënali ed bendacan el, do gë end omac or gër bandëwëra band këni reyarand gë enjata këm enj. Bejo ecampëre fo kë wëlawënd. Bejo ala aņo dëcand na exo kemëna emelëya ed ŝenene ed bend Kaxanu, ar gë ekwëta.

⁵ Er këme ŝaland gë apela aņo in ex, ebalër ed gë owëkw owënëk el, gë onden onjekax, do gë ekwëta ed däl.

⁶ Bërëmar ga langangan këni bejo, nambëraxën këni gër oyeyandëran or gë ofëcak këm.

⁷ Arafëna këni rafënanand mëne bësëyali bër acariya and Moyis hi këni xarak abi pëni ex na er këni sëyalind in, bëte abi pëni ex na er këni balëkënalind edeyara in.

⁸ Aye nang këne mëne acariya aņ er ŝenene ex angëmëne ey tëfënd ang kë rend ak.

⁹ Nangëne mëne er kë rend acariya in bësëxwëpëtaxik bën, gë bëwëŝik bën, gë bësëmbak bën, gë bëwendëran bën, gë bëyepën bër bend Kaxanu bën, gë bëlaw bër bëxarëk bërebën bën, do gë bëlaw bër bela bën këbi rend. Abi dend na bër ŝenene bën.

¹⁰ Bëte afaß faß këbi bër yëlayand gër eñac bën, gë bër kë rind asoŝan gë asoŝan, er këni rind asoŝan gë asoxari in, gë bëfan bër okadëp bën, gë bënëgwëŝ bën, gë bër kë yaŝarënd gër enëgwëŝ bën, do gë dëk bër hëpëk osëyali or däl bën.

¹¹ Eņo kë rend Atëfëtan and xwëtënan ke aņ, and enjaran end Kaxanu, mëņ ar gë onënga aņ.

End oyekax or Kaxanu enj

¹² Wëno gë emëkw edam el ðek këmo šëkwand Yesu Kërisët, Axwën arebi an, mëŋ ar yël ke ojaŵ od me dixënënd andiyen andexëm an. Gayik axwëta xwëta ke sebënanaxën ke andiyen aŋo.

¹³ Damana exe tanaxën Axwën an gër andiyen andexëm aŋo, wëno ašir bamo širënd, arixëra bamo rixërand, abamo faxëtën na. Barikan mëŋ lëkaya baxe gë axaŷënan isëm ado bayik amo kwëta bana, abame nang na mëne në emenan emo, në end oŋëpëgënan od lëb bax gër emëkw edam ok.

¹⁴ Ata Axwën arebi an, mondako xureli këŋo gër ndam oyekax ol, gë ekwëta el, do gë aŋana and gër Yesu Kërisët aŋ.

¹⁵ Eyeyan elo ed mokwëta ex do ed ŷapëk momëxwëta: Yesu Kërisët ayow yow baxo gër ngwën ebi pexën bëwendëran bën do wëno ex ar xurik me mendëra an.

¹⁶ Barikan Kaxanu gë axaŷënan wëlaya ke ex canayaxën gër wëno aŵendëran asëm ajo ðek ebuŋa ed Yesu Kërisët el, ang amatali and bër këŋo xwëta eni cotaxën aniyen and din aŋ.

¹⁷ Ar wunëk nand ex yo an,
ar ax cësënd na an,
ar anëŋo watënde na an,
ar ex gabat Kaxanu an,
xwënëk owëlik ol do gë enjaran eŋ din ir din!
Amen!

¹⁸ Asëniwën Timote, apela and këmi sebënanënd aŋ andamat ex gë bënd reya këni anëka bëlaŵënel endey eŋ. Awa wëj kwitayind eyeyan elo ey kemënanaxën ang ar okaxër fo.

¹⁹ Mëlayal ekwëta ed xwëta këyo Kaxanu el, bëte bayilexi onden onjekax. Onden onjekax oño bërëmar abi bo ex na, do në eño lapaxën këni ekwëta ed Kërisët el.

²⁰ Gër enga eño hi këni Imene do gë Alekësandër. Mëñ lëxwaxën këmëni gër Sindan eni tÿyaxën mëne ax gi ex na mocir Kaxanu.

2

End cale eñ

¹ Awa ga re këme ðamana beño ðek, kemënayindën cale in, karayindëno Kaxanu, caleyindëno, këlayindëno do cëkwayindëno në end bëla ðek.

² Calenindënëbi bemun beñ do gë ðek bër ex bëlëngw bën, ene ðiyaxënënde aniyan and gë aketëxeta, and gë emer këm, ene bëlëkënalixënënde end Kaxanu eñ, do ene ðiyaxënënde ang ÿapëk ak.

³ Eño aye yek do aňan ñan ko Kaxanu, Afexën arebi an,

⁴ mëñ ar ÿandi këño eni pex ðek bëla an do eni nãtën enang ed end ðal el.

⁵ Enimin, Kaxanu ibat fo ex, bëte aňatelinðer ar Kaxanu gë bëla abat fo ex, mëne ngëñ ala ar këno wãcënd Yesu Kërisët an.

⁶ Ayëlaya yëlaya ko mëñ dëñ akanji ebi dacëtaxën ðek:

osede olo wãsin këbo nand ÿapëk na mëne Kaxanu ÿandi këño eni pex ðek bëla bën.

⁷ Në eño yataxën ke Kërisët me gi afemëra, parëxanda do asëyali bër benëng bëcëxe eni

gixën gër ekwëta do gër däl. Er këme rend ijo däl ex, ame nëgwëšënd na.

⁸ Awa er ýandi ke gër ed ex yo, bësošan bën eni yënënd otaxan omënëk, eni calend gë emëkw epešax, gë oxoý këm do gë ecampëre këm.

⁹ Er ýandi ke bëte, bësoxari bën eni cudarand šenene, këreni cudand na banjëm band xaw. Këreni ñañënarand na gë bamël, këreni bakarand na kañe, gë oyeri, do gë bebër xemëk akanji.

¹⁰ Barikan gër oye orebën watindëlex bandixa banjekax ang ýap këbi bësoxari bër fëb këño Kaxanu.

¹¹ And këni sëyalind añ, bësoxari bën cësinayindëlexëni do eni baxëtënd aye.

¹² Asoxari an cësinayindëlexo, amo yël ex na or gapak or exo tëyalind ol, amo yël ex na eño bëñand ašošan an.

¹³ Enimin Kaxanu, Adam ýana këño ebay el, bayaxën këño Xawa.

¹⁴ Do šabucara in wa yifa këño asoxari an exo dëngw gër emëšen ed Kaxanu, año yifa ex na Adam, ašošan an.

¹⁵ Barikan fo afex ko fex, ga rëw rëw ko angëmëne exo bayi gër ekwëta, gër ebal ed bela, gër eyëlaya ed gër owënëk, do gër ebana.

3

End bëlëngw eñ

¹ Eyeyan elo ed mokwëta ex: ašošan ar ýandi këño enim exo gi alëngw gër Amara an, andiyen anjekax ýandi këño exo dind.

² Awa aŷap ŷapëk, alëngw an exo gi ar gë end këno nöp këm, icën ind asoxari abat, ar gë anjus, ar ye këno onden, ar ŷenene, ar këbi xwëtayand aye bëliyer, ar xamëk oséyali.

³ Gilexo ar bëngw këno onden, ar këni wëlërend gë bela, ar kë xwëÿëtand aŷana and kodî, kërexo gi na aŷeb, kërexo gi na axeÿax.

⁴ Kadacindëlexo aye ekun edexëm el, do obaŷ orexëm ol eni gi bër kë baxëtënd apela ang ŷapëk ak.

⁵ Enimin, angëmëne ala axo kam ex na ekadac ed ekun edexëm el mondake cëŷ ko wëlaya Amara and Kaxanu aŷ?

⁶ Alëngw an, kërexo gi na dë ar wëk ecede end Yesu këdi këno fufën ndafënan in do exo gi ar këno nöp Kaxanu andamat gë ŷabucara in.

⁷ Aŷap ŷapëk bër ax gi ex na okëreceŷ bën eni deyand osede oyekax end ola orexëm eŷ, këdi kë nëxena oŷac orexëm ol, do eŷo tëra ŷabucara in gë bamene bandexëm baŷ.

End ojakër eŷ

⁸ Ojakër ok bëte aŷap ŷapëk eni gi bër mopëb, bër ax gi ex na gë odëxas oki, bër abi kurelind na ngoy in, do këreni gi na bër kë ŷotënd kodî gë enëgwëŷ.

⁹ Aŷap ŷapëk eni mëlayand end ekwëta end ŷonët ko Kaxanu gë onden onjekax eŷ.

¹⁰ Canayalex pere gër bandixa bandebën mëne bër ŷenene exëni eni nãanaxën andiyen and ojakër aŷ, angëmëne gë end kënebî nöp këm exëni.

11 Bëte bësoxari bër ex ojakër bën aÿap ÿapëk eni gi bër mopëb, bër gë anjus, bër mokwëta gër beÿ dek, këreni gi na bëxapëndër.

12 Jakër in gilexo icën ind asoxari abat, kadacindëlebi ſenene obaſ orexëm ol, do mëlayayindëlexo aye ekun edexëm el.

13 Ojakër od kë rind ſenene andiyen andebën ok bër gër amara bën dek afëb kënebi fëbënd, do axor këni xorënd eni yeyan gë or gapak osëm end ekwëta ed bar këbo gër Yesu Kërisët eſ.

End ekwëta eſ

14 Timote, mondako këmi ÿëgwënëlınd kayëta ijo ado ga këme yarënd mi nëngali gogo dëſ.

15 Bari angëmëne ame yeli ex na gërëgako, anang nang këy ang ÿapëk ey dıyand gër ekun ed Kaxanu ak. Ekun elo ex Amara and Kaxanu and wëlayak dal aſ, ang xëcar ir aciw fo.

16 Endey end Kërisët end ſon baxo Kaxanu elod ga ÿanak ngwën aſ cëſ, iyo aÿap ÿapëk enang ed mëne mbaſ rafëk el:

Kërisët ſanayaw bax gë eman,
Angoc Amënëk aſ wäsin këbo mëne ar ſenene
ex,

gër omeleka ſanaya ko,
endexëm eſ sëfët këni gër benëng bend bela,
bëranjëm wak endexëm eſ gër ngwën,
Kaxanu wëla këſo gër orën gë enjaran eſ.

4

End bëseÿali bër benëgwëſ eſ

1 Barikan Angoc and Kaxanu aſ rek kerët mëne gër bakey bapelatar, bërëmar ayepan këbi

yepan ekwëta ed Kërisët el do eni kwënda etëf ed bend ßangoc ßand këbi nambelind bela, do gë osëyali or bend bëyël.

² Bën ex bër kë wãnd enëbi yifa bëyëñënax bër kë labayand bën, gë bënëgwëê bën, do gë bër ßor kënebi gër onden gë endun end lëxw bani xali warëk bën*.

³ Bela bëjo kë sëyalind mëne bërëwãk end Yesu do nang këni ðal bën këreni ñërënd na, bëte këreni yambënd na bëbërëmar xarak Kaxanu rik eni yambënd do eno cëkwand.

⁴ Dek er ri ko Kaxanu in aye yek, yoweÿ ax gi ex na er monap angëmëne ašëkwa këno šëkwand en yambaxën.

⁵ Enimin, er ex yo kë wënënd gë eyeyan ed Kaxanu el do gë cale in.

End ola or ariyenin ar Kërisët eñ

⁶ Angëmëne ßapela ßaño këyëbi sëyalind bëmaÿe bën, ata key hi ariyenin ayekax ar Yesu Kërisët. Mondako kë šanaya gër ola oreÿ mëne bend ekwëta beñ do gë osëyali or këy sëfënd din ol ang eyamb yamb fo hik gër aniyandey.

⁷ Barikan cusëlëbi bër kë sëyalind bendacan bend kë yepënënd bend Kaxanu bën gayik bësoxari bëxarëk këbi balënd bendacan beño. Kemënal ey ðiyand ang yãpëk exo ðiyand ar këño balënd bend Kaxanu ak.

⁸ Edi ed bëbër kë bëngwënënd eman el ofëcak dëñ exëna. Barikan ofëcak or ar këño balënd

* **4:2 4.2** Amëd año, mondako banëbi šorënd bëlaw bër bela bën do gë okaðëp od bañi nawand bëxwën bërebeñ ok ang kënebi rind oxey nanganëme fo ak.

bend Kaxanu ol xucak ex kēbēn. Gayikwa Kaxanu abeya beya kēŋo ar kē rind mondako an aniyān and gērēgako aŋ do gē and kē yowēnd aŋ.

⁹ Eyeyan elo ed dāl ex, ed mokwēta aye ex.

¹⁰ Biyi asoro kēne soronde gēr andiyen, ax-emēna kēne xemēnande gēr ekwēta, ang bēr okaxēr fo gayik ayar kēnēŋo yarēnde Kaxanu, mēŋ ar gē aniyān an, adofa dek dek in bērēwāk endexēm bēn.

¹¹ Ata beŋo ŷapēk eyēbi pelēnd, do eyēbi tēyalind eni dind.

¹² Awa wēj cēŋ, gil ar ŷenene, do bērēwāk bēn korindēlexēni eni tēfēteli: eyeyan edey el, gē bandixa bandey baŋ, gē aŋana andey aŋ, gē ekwēta edey el, do gē oŵēnēk orey ol. Gayik ŷambenjar fo bayi kēy, ala kērexi yaf na.

¹³ Xali yatir kēme yeli, balēkēnalind opēn od akayēta and Kaxanu ok gēr Amara. Pelindēbi eni kemēna gēr etēf ed er kēni wēlelind in bēte kemēnal eyēbi tēyalind.

¹⁴ Anjēla and re baxo alawēnel mēne Kaxanu yēl ki nē end oyekax orexēm aŋ, aŷot ŷot kēy and xwētan kēni otaxan, do ŷalen kēni enga end bēlēngw bēr gēr Amara eŋ. Do wēj kērey dangangan na.

¹⁵ Balindēlexi mbaŋ beŋo, yēlayal gē emēkw el dek gēr andiyen andey. Ata kēni ŷana eni watēnd bēr gēr Amara bēn dek mēne ola orey ol ang kēŋo ŷapanēnd Kaxanu ak dēŋ hik.

¹⁶ Titinalind aniyān andey aŋ do gē osēyali orey ol. Balēkēnalind beŋo dek. Enimin, angēmēne mondako kēy rind afex kēn fex wēj,

do gë bër ki baxëtënd bën.

5

End bapela eŋ

¹ Ar xarëna ki gër Amara an, pelëralo ang sorix fo, këreyëŋo dexëra na kwëlay-kwëlay. Do ocambenjar ok, pelërayindëbi ang bëmaÿe fo.

² Asoxari axarëk an, pelëralo ang norix fo, do bësoxari bëbeja bën, pelërayindëbi gë owënëk, ang bëmaÿe fo.

³ Dëcarayindëbi bësoxari bësebëta sebëta bën angëmëne ani gi ex na gë ar këbi rëcarand.

⁴ Angëmëne asoxari asebëta sebëta an gë obaš exo ba gë ejiw bën exo, bën tÿalexëni emëlaya edexëm el. Mašëninđelenëbi bëxarëk bën edëba ed lëba kënëbi el eni wataxënënd bër hi këni ekun ebat bën ekwëta edebën el gayik eŋo këŋo nënganënd Kaxanu.

⁵ Ar hik enim asoxari asebëta sebëta an, ar bayik gabat an, ajo ex ar këŋo yarënd Kaxanu an. Ciš wec xemëna ko cale in do gë okar od eŋo dëca ok.

⁶ Barikan asoxari asebëta sebëta, ar xwëndak amëkëña and gë bësošan an, anëka nemi ko ado ga bayi ko mopër.

⁷ Eŋo ÿapëk eyëbi pelënd bësoxari bësebëta sebëta bën eni dÿiyaxënënd gë end kënëbi nöp këm.

⁸ Angëmëne ala eŋo key emëlaya ed bërexëm el, adofa bër ekun edexëm bën, anëka lap ko ekwëta edexëm el, anëka ÿëŋën ko nëmëc gë ar elod axo gi ex na këreceŋ an.

⁹ Eno ñëgwaxën asoxari asebëta sebëta an gër akayëta and bësoxari bësebëta sebëta, tëkëleño pere bënüy ofëxw ocongebat do gilexo ar yër baño asošan abat fo.

¹⁰ Bela bën deyayindëlexëni mëne ari baxo rind benjekax beño: aye babi wëlayand obaš orexëm ol, gë emëkw epešax babi xacand bëliyer bën, anebën babi nebënënd osapar oñ bërëwak bën, arëcara babi rëcarand bër šëmura këbi bën, do benjekax bend ex yo baxo rind.

¹¹ End bësoxari bëbeja bësebëta sebëta eñ cëñ, aýandi këbi ýandid enëbi ñër gašëxe, do eno teb Kërisët. Men ex, këreyëbi ñëgwënd na gër akayëta and bësoxari bësebëta sebëta.

¹² Bësoxari bësebëta sebëta bër sebëk eyëla eñanar ed yëlaya bani el monëp exëni.

¹³ Mondako hixën këni bëxwëlaraxik, do këni sëfërand bëciw bën gë omëkara. Bëte er xurik ex ñënën in ex, ga wata këni eyeyan gë ofëcak këm el, do gë edil ed gër bend ax gi ex na bendebën el.

¹⁴ Awa wëno er këmëni xaranënd bësoxari bëbeja bësebëta sebëta bën enëbi ñërënd gašëxe, enëbi cotënd obaš, do eni mëlayand šenene ekun edebën el, këdi këni šot bërangoýëra andebi bën er kënëbo renaraxën.

¹⁵ Bërëmar cëñ anëka šapa këni do këno sëfënd Sindan in.

¹⁶ Angëmëne asoxari arëwak ebi cot bësoxari bër nëng irexëm bësebëta sebëta, kemënalexo ebi dëcarand këdi këbi lenga emëlaya edebën el bër gër Amara bën do eni tëkwan edëcaran ed bësoxari bësebëta sebëta bër ax gi ex na gë ar

këbi rëcarand bën.

End epëb ed bëlëngw bër Amara eŋ

¹⁷ Bëlëngw bër Amara bër kë xadacënd ŝenene bën, aŷap ŷapëk enëbi pëbënd do enëbi dëcarand adofa bër xemënak gër epemëra ed end Kaxanu do gër osëyali bën.

¹⁸ Ga rek wa Oñëgw Omënëk ok:

«Këren kapënd na etëŷ ed engaŝ end këjun wëñënd bële eŋ.» Do

«Ar kë riyenind an ŷap këŋo acosa aŋ[☆].»

¹⁹ Ar këŋo lëxwënd alëngw ar Amara xarak axo gi ex na gë otede oki ba otas, këreyëŋo yaka na.

²⁰ And ko wëndëra ala gër Amara aŋ, dexëralo poyoma eni yëdaraxën bëte bër bayik bën.

²¹ Axara xara këmi gë obal osëm, gër lëngw ir Kaxanu, gër ir Yesu Kërisët, do gër ir omeleka omënëk: tanal ey dind dek bebër këmi felënd bëjo, do ŷoweŷ kërey dind na gë epitëndër ed bela.

²² Kemënal wëj dëŋ ey gi din awënëk fo. Kërexu nëkanënd na etana ed ala mokwëtan otaxan exo gixën alëngw el, gë ala këren bar na gër beñëŋenax bendexëm.

²³ Gayikako laŋ ki yambënënd acël aŋ xali ey đaki, cebind təkër ngoy in, tebël eceb ed wayët men fo el.

²⁴ Na fo exëni bër gë bamena band wat-wat đamana kiti ex gixën indebën in. Bëte na fo exëni bër kë ŝonënd bamena bandebën do and kë nëka aŋ fo kë ŝanayand.

☆ 5:18 5.18 Andocane 25.4

²⁵ Andamat ex gë bandixa banjekax baŋ: band ax watind na ataŋ baŋ dëŋ ax bayi na ga ŝonayak.

6

End okadëp eŋ

¹ Dek bër ex gër oxadëp bën, pëbindëlenëbi mbaŋ bëxwën bërebën bën ang ŷapëk ak, mënŋ bayik bër fac bën ani denara na oŵac or Kaxanu ol, ani yepën na osëyali orebi ol.

² Bërëŵak bër ex okadëp bën kërenëbi yafënd na bëxwën bërebën bën ado ga hi këni bëmaŷe bëndebën gër ekwëta. Bëte gayikako bën bërëŵak, bër ñan këbi Kaxanu kënëbi riyen-inënd, këbënëlex nëmëc andiyen andebën aŋ.

End osëyali eŋ

Eŋo ŷapëk eyëbi tëyalind do eyëbi pelënd eni di.

³ Angëmëne ala exo tëyalind becëxen, bend fitarëk gë eyeyan ed ðal ed Yesu Kërisët, Axwën arebi el, angëmëne axo tëfënd na bebër sëyali këmun mëne aŷapan këŋo ŷapanënd Kaxanu bën,

⁴ awa ajo ar fufën këŋo ndafënan hi ko, ar nemërak hi ko. Mokaŋj këŋo xanjënd ecampëre el do gë ekeŷër ed në end bëndey bëtil el. Mondako kë ŷanand oyakëraxi ol, gë oŵer oŋ, gë odenar ok, do gë eyëlandër ed beñëŋëxax el.

⁵ Bakucara band bela bëjo baŋ ax kwëtënd na gë ekwët. Bakucara band bër gë onden otëmbak ex, band bër ax bo ex na gër ðal ex, band bër kë

yëländ mëne ekwëta ed xwëta këno Kaxanu el acotëraxën ex.

⁶ Eyo ðal ex mëne, ebalëkënali ed bend Kaxanu el acotëraxën atëm ex angëmëne anëngandëra ki nëngandërand gë er şot këy in.

⁷ Enimin ýoweÿ ane mëlaw exe na gër ngwën ro, bëte ýoweÿ ane mëlaye na.

⁸ Awa angëmëne aşot këne şotënde eyamb yamb in, do gë banjëm ban, gwac ebo.

⁹ Barikan bër kë faÿënd gër owëkw orebën mëne afo eni gi bër gë napul bën kë wëcënd gër eñëjënax. Bën këbi sëränd ang amene fo oñandi odanjëm, oñandi opënrëx, oñandi oñëjënax. Do oñandi oko këbi sëwënd eni nëxena do eni nambëra.

¹⁰ Enimin, añana and kodı an ex anëmbët and gër ed kë ýanawënd toro ind ex yo. Ata bërëmar ga ñan këni kodı in, ñawëtaxën këni ekwëta ed Kaxanu el, do sëkaxën këbi oyot odanjëm.

Bapela bapelatar ban

¹¹ End wëj ala ar Kaxanu eñ cëj, kwëÿëtal bejo. Calayind anıyan and şenene, and ñan ko Kaxanu, and gë ekwëta; anıyan and gë añana and bela, and gë ebuña, and gë onden omëngwëk.

¹² Kaxërind okaxër onjekax ond ar xwëta këno Kaxanu oñ, kwëtayal aye anıyan and din and waceli ki an. Ax gi ex na nde ga şot këy anıyan año rixën bay osede oyekax ol do wël këni otede odanjëm?

¹³ Gër lëngw ir Kaxanu, mëj ar këbi yëlënd anıyan ðek bebër gë onjën an, do gër lëngw ir

Yesu Kërisët, mëṅ ar reya bax osede oyekax gër lëngw ir Poṅës Pilat an, këmi felënd eṅo:

¹⁴ kwëtayal apela aṅ do ey bayi, aṽënëk do ar gë end këno nëp këm xali yatir ko bakaw Yesu Kërisët, Axwën areḃi an.

¹⁵ Abaka ko bakaw and këṅo ḥatan Kaxanu aṅ, mëṅ ar ex gë onënga do axwën owun an, ar ex enim Emun an, ar ex Emun end bemun an, do Axwën ar bëxwën an.

¹⁶ Mëṅ gabat ex ar ax cësënd na an, mëṅ ex ar lëgëk gabat gër angoben an, angoben and ala ax tëkand na aṅ, angoben and elod ala ax wat na aṅ, angoben and ala ax kor na exo nëkon aṅ. Mëṅ xwënëk enjaraṅ eṅ do gë panga ind din ir din iṅ! Amen!

¹⁷ Pelëralëḃi bër šotëk napul ir gër ngwën ro bën, këreni dafëṅand na. Pelëläḃi eno kwëtand Kaxanu, mëṅ ar kë yëlënd dëm beṽ dek, ebo nëṅandëraxënëṅd an. Do këreni kwëtand na napul ir kë xor ex kwët ijo.

¹⁸ Pelëläḃi eni dind enjekax eṅ, napul irebën in gilex aṅësa and bandixa banjekax. Dëcarayindëlenëḃi bela bën gë emëkw epešaṅ, këreni kwëjēnalind na.

¹⁹ Do Tayëndëlexëni mondako napul isëm ir këni xanaḋ ecan ecan in, eni dëkayaxën aniyān and ḋal aṅ.

²⁰ E Timote, kwëtayal aye er xwëtēṅan ki Kaxanu in. Kwëṽëtäl eyeyān ed kë yepēṅēṅd bēṅd Kaxanu el, tebël eyeyandëra ed ax bašēṅēṅd

na ekwëta el. Kwëÿëtal ecampëre ed në end onangëran or fudac ol.

²¹ Bërëmar cëŋ, ga bani soŋanand mëne aŝot ŝot këni onangëran olo, seboxën këni ekwëta ed Kaxanu el.

Awa Kaxanu yëlëlenun oyekax orexëm ol!

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: Oniyan

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 29 Apr 2025 from source
files dated 29 Apr 2025

8b7902f3-5e35-5b89-86b2-c6da1be458b9